

Miliki RM82,000 secara salah, keldai akaun dihukum penjara dua minggu

SIBU: Seorang keldai akaun dijatuhi hukuman penjara dua minggu oleh Mahkamah Majistret semalam atas dua pertuduhan memiliki wang secara salah dalam akaun banknya berjumlah RM82,000.

Ling How Siong, 31, bagi pertuduhan pertama didakwa memiliki RM35,000 dalam akaun banknya yang diperolehi secara salah pada 27 Oktober 2024, jam lebih kurang 4.22 petang di sebuah bank Jalan Kampung Nyabor.

Pertuduhan kedua, dia didakwa memiliki wang sebanyak RM47,000 yang diperolehi secara salah di sebuah lagi bank Jalan Kampung Nyabor pada 16 Oktober 2024, kira-

kira jam 4.19 petang.

Bagi kedua-dua pertuduhan itu, Ling didakwa di bawah Seksyen 37(1) Ordinan Kesalahan Kecil Sarawak 1958, yang memperuntukkan hukuman penjara sehingga tiga bulan dan denda sehingga RM500.

Berdasarkan fakta kes, siasatan yang dijalankan pihak polis mendapati pada 27 Oktober 2024, pengadu telah membuat pembayaran berjumlah RM82,000 melalui mesin deposit tunai ke dalam dua akaun bank yang didaftarkan atas nama tertuduh.

Pengadu membuat pembayaran tersebut bagi melangsaikan hutangnya dan telah

diminta untuk membayar sejumlah wang lagi bagi menyelesaikan hutang tersebut.

Namun, pengadu tidak lagi mempunyai wang bagi membayar hutang menyebabkan dia diugut.

Bimbang dengan keselamatannya, pengadu kemudian membuat laporan polis.

Siasatan dengan pihak bank juga mendapati wang berjumlah RM82,000 telah berjaya dimasukkan ke dalam akaun bank yang didaftarkan atas nama tertuduh.

Tertuduh juga gagal memberikan penjelasan yang munasabah mengapa wang tersebut dibayar ke dalam akaun bank miliknya.